

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

ETIČKI KODEKS

Sarajevo
Januar 2006. godine

Na osnovu ovlaštenja Konkurencijskog vijeća koja proizilaze iz Zakona o konkurenciji («Službeni glasnik BiH», broj 48/05), kao i obaveza i odgovornosti člana Konkurencijskog vijeća, državnog službenika i zaposlenika Konkurencijskog vijeća u vezi provođenja ovoga Zakona i drugih zakona i propisa Bosne i Hercegovine, Konkurencijsko vijeće na 22. (dvadesetdruoj) sjednici održanoj dana 24. januara 2006. godine, je usvojilo

ETIČKI KODEKS

1. Opće odredbe

- 1.1. Odredbe Etičkog kodeksa uključuju međunarodno priznate standarde, norme i pravila ponašanja koja se odnose na djelovanje Konkurencijskog vijeća, kao samostalnog, nezavisnog, nepristrasnog i profesionalnog tijela koje poštuje, štiti i primjenjuje zakone i propise Bosne i Hercegovine.
- 1.2. Etički kodeks definiše način ponašanja, poštivanje općih i posebnih moralnih i etičkih principa od strane člana Konkurencijskog vijeća, državnog službenika i zaposlenika Konkurencijskog vijeća, pri obavljanju svakodnevnih poslova i obaveza.

2. Pravila djelovanja i ponašanja u Konkurencijskom vijeću

- 2.1. Član Konkurencijskog vijeća, državni službenik i zaposlenik Konkurencijskog vijeća, bez obzira na način imenovanja ili izbora, odnosno da li dolazi iz javnog ili privatnog sektora dužan je ostati profesionalno neovisan od bilo kojeg političkog i ekonomskog utjecaja.
- 2.2. Član Konkurencijskog vijeća, državni službenik i zaposlenik Konkurencijskog vijeća, u skladu sa zakonima Bosne i Hercegovine, preuzima odgovornost ako neovlašteno objavi informaciju (poslovnu tajnu) koju je saznao u postupku pred Konkurencijskim vijećem ili putem sudskog, prekršajnog ili upravnog postupka pred sudom ili institucijama Bosne i Hercegovine, a koja ne smije biti objavljena prema zakonu ili odlukama Konkurencijskog vijeća ili nadležnog suda ili institucija Bosne i Hercegovine. Ova obaveza obuhvaća sve činjenice, informacije i dokumenta koje su članovi Konkurencijskog vijeća i osoblje Konkurencijskog vijeća svjesni ili imaju tokom izvršenja svojih utvrđenih dužnosti.
- 2.3. U okviru ovlaštenja i djelokruga rada član Konkurencijskog vijeća, državni službenik i zaposlenik Konkurencijskog vijeća mora poštovati pravo na slobodan pristup informacijama i poduzimati sve mjere koje su neophodne za propisanu zaštitu procedura objavljivanja poslovne tajne, koja posebno obuhvaća pravna dokumenta, sadržaje, procedure i konsultacije, kao i rezultate prije donošenja konkretne odluke.
- 2.4. Član Konkurencijskog vijeća, državni službenik i zaposlenik Konkurencijskog vijeća mora poštovati radnu disciplinu, što podrazumijeva ažurnost, pažnju, razumijevanje u izvršavanju svakodnevnih poslova i obaveza.
- 2.5. Član Konkurencijskog vijeća, državni službenik i zaposlenik Konkurencijskog vijeća ne može biti uključen u političke aktivnosti političkih stranaka u Bosni i Hercegovini.
- 2.6. Prilikom primanja u radni odnos u Konkurencijsko vijeće obaveza je pridržavanja pozitivnih propisa koji se odnose na primanje užih članova porodice, kao i pridržavanja odredbi i propisa o sukobu interesa.
- 2.7. Član Konkurencijskog vijeća, državni službenik i zaposlenik Konkurencijskog vijeća u obavljanju svakodnevnih aktivnosti i izvršavanju poslova pažnju će posvetiti primjeni

etičkih normi, ljubaznosti i kulturnog ponašanja u međusobnim odnosima, kao i u odnosima i saradnji s trećim osobama odnosno strankama.

- 2.8. Član Konkurencijskog vijeća, državni službenik i zaposlenik ne smije zahtijevati ili primati poklone, povlastice ili druge koristi za sebe, svoju porodicu i rodbinu u obavljanju svojih poslova.

3. Član Konkurencijskog vijeća

- 3.1. Član Konkurencijskog vijeća, u skladu Zakonu o konkurenciji, ima status upravnog sudije i njegovo ili njeno djelovanje je nespojivo sa svakom drugom direktnom ili indirektnom, stalnom ili povremenom aktivnosti ili dužnosti, uz izuzetak akademskog djelovanja i rada u stručnim i naučnim tijelima.
- 3.2. Član Konkurencijskog vijeća u vršenju akademskih aktivnosti i radu u stručnim i naučnim tijelima mora se ponašati uravnoteženo u smislu vlastitog prava na slobodno izražavanje i vlastitih obaveza člana Konkurencijskog vijeća.
- 3.3. Član Konkurencijskog vijeća koji je bio u menadžmentu, upravi kompanije ili na drugi način bio povezan s strankom u postupku pred Konkurencijskim vijećem, bit će izuzet iz postupka, na zahtjev, u kome se njegova ili njezina nepristranost može dovesti u pitanje.
- 3.4. Član Konkurencijskog vijeća koji dobije dar(ove) mora isti tretirati u skladu sa propisima Izborne komisije BiH.

4. Državni službenik i zaposlenik Konkurencijskog vijeća

- 4.1. Državni službenik i zaposlenik Konkurencijskog vijeća je dužan obavijestiti Konkurencijsko vijeće o vlastitoj djelatnosti i radu u privrednim subjektima (u kojima je imao poslovne interese ili odgovarajuće funkcije) ili ako je na drugi način bio povezan s strankom u postupku pred Konkurencijskim vijećem, s ciljem izbjegavanja učestvovanja u takvom predmetu.
- 4.2. Državni službenik i zaposlenik Konkurencijskog vijeća ne može obavljati poslove izvan onih propisanih Zakonom o konkurenciji, Pravilnikom o organizaciji i sistematizaciji Konkurencijskog vijeća i drugim propisima koji su nespojivi i koji negativno utiču ili smanjuju efikasnost i kvalitetu obavljanja svakodnevnih poslova.
- 4.3. Ukoliko državni službenik i zaposlenik Konkurencijskog vijeća nije u mogućnosti ocijeniti ili je u dilemi da su određeni poslovi nespojivi s poslovima Konkurencijskog vijeća potrebno je da se radi dobijanja savjeta obrati predsjedniku.
- 4.4. Državni službenik i zaposlenik Konkurencijskog vijeća je obavezan izbjegavati neprihvatljivo ponašanje tokom radnog vremena i nakon radnog vremena.
- 4.5. Državni službenik i zaposlenik koji osnovano sumnja da se od njega zahtjeva postupanje na način koji je neprimjeren ili neetički ili je na drugi način nespojiv s Etičkim kodeksom, prijaviti će takav zahtjev pretpostavljenom i postupati u skladu sa zakonom.
- 4.6. Državni službenik i zaposlenik Konkurencijskog vijeća treba uvijek obavijestiti pretpostavljenog o ponašanju koje nije u skladu sa pravilima i normama Etičkog kodeksa.

5. Primjena Etičkog kodeksa

- 5.1. Primjena odredbi Etičkog kodeksa osigurava objektivnost i profesionalnu odgovornost, kao i nediskriminaciju u djelovanju i ponašanju člana Konkurencijskog vijeća, državnog službenika i zaposlenika Konkurencijskog vijeća.
- 5.2. Etički kodeks će biti tumačen i primjenjen na najefikasniji način s ciljem provođenja odredbi Zakona o konkurenciji, pozakonskih akata i drugih propisa Bosne i Hercegovine.
- 5.3. U slučaju nepoštivanja Etičkog kodeksa Konkurencijsko vijeće će poduzeti odgovarajuće radnje i postupke.
- 5.4. Primjenom i pridržavanjem odredbi Etičkog kodeksa nastojat će se osigurati i očuvati integritet, nepristranost i ugled Konkurencijskog vijeća i služiti kao pozitivan primjer drugim institucijama i tijelima u Bosni i Hercegovini.

6. Prihvatanje Etičkog kodeksa

- 6.1. Član Konkurencijskog vijeća, državni službenik i zaposlenik Konkurencijskog vijeća potpisat će Izjavu iz koje proizlazi da je upoznat s sadržajem i da će se pridržavati općih i posebnih obaveza i principa Etičkog kodeksa.
- 6.2. Prilikom potpisivanja Izjave svaki član Konkurencijskog vijeća, državni službenik i zaposlenik Konkurencijskog vijeća dobit će primjerak Etičkog kodeksa.
- 6.3. Izjava je sastavni dio Etičkog kodeksa i potpisuje se u dva primjerka, od kojih se jedan primjerak deponira u personalni dosije, a drugi u arhivu Konkurencijskog vijeća.

7. Završne odredbe

- 7.1. Usvajanjem ovoga Etičkog kodeksa prestaje važiti Etički kodeks usvojen na 3. (trećoj) sjednici Konkurencijskog vijeća održanoj 03. juna 2004. godine (K.V. broj: 01-12/04 od 07. juna 2004. godine).

K.V., broj: 01-01-34-091-I /06

17. februar 2006. godine

Sarajevo

Predsjednica

Konkurencijskog vijeća

Sena Hatibović